



KEMENTERIAN PEMBANGUNAN WANITA,
KELUARGA DAN MASYARAKAT

SIARAN MEDIA

110,284 PENERIMA BANTUAN KEBAJIKAN JKM TERIMA MANFAAT DI BAWAH PROGRAM PRIHATIN KASIH

KUALA LUMPUR, 13 JULAI - YB Datuk Seri Rina Mohd Harun, Menteri Pembangunan Wanita, Keluarga dan Masyarakat dan MyKasih Foundation, hari ini telah mengadakan sesi turun padang di **The Store, Pudu Plaza** untuk meninjau pelaksanaan program **PRIHATIN Kasih**. Seramai 4 orang klien Jabatan Kebajikan Masyarakat (JKM) yang terdiri daripada seorang Warga Emas dan tiga Orang Kurang Upaya (OKU) terlibat dalam pelaksanaan Program **PRIHATIN Kasih**.

“Program **PRIHATIN Kasih** dengan peruntukan **RM100 juta** ini telah diumumkan sebagai salah satu langkah pakej **PEMERKASA**, bagi membantu kos sara hidup bagi golongan miskin bandar. Program bantuan barangan dapur ini disalurkan secara tanpa tunai atau *cashless* melalui penggunaan MyKad dan akan memanfaatkan **300,000** isi rumah di bandar-bandar utama di seluruh negara. Daripada jumlah keseluruhan, seramai **110,284** penerima bantuan kebajikan JKM yang berada dalam kelompok miskin bandar layak untuk mendapat manfaat daripada program ini. “ujar YB Menteri.

Keluarga yang menerima **PRIHATIN Kasih** telah dipilih daripada keluarga miskin bandar, dengan mengambil kira pangkalan data dari Jabatan Kebajikan Masyarakat dan e-Kasih yang seterusnya disemak silang dengan pangkalan data Bantuan Prihatin Rakyat(BPR). **PRIHATIN Kasih** melibatkan bantuan bulanan sebanyak **RM100** untuk tiga bulan yang boleh

digunakan untuk **pembelian barangan makanan asas seperti makanan dalam tin, susu bayi, beras, minyak masak, telur, dan sebagainya** berdasarkan pilihan isi rumah.

Program PRIHATIN Kasih ini melibatkan lebih daripada **300 rangkaian pasar raya dan kedai di seluruh negara termasuk Mydin, Giant, Econsave, The Store, Pacific, Milimewa, 99 Speedmart, Lotus Stores (Tesco) serta kedai-kedai runcit.**

Fasa Pertama yang telah dilaksanakan bermula pada 1 Julai 2021 di Selangor dan Kuala Lumpur menunjukkan maklumbalas positif dari para penerima.

Penerima PRIHATIN Kasih yang layak akan menerima SMS dari MyKasih untuk mengesahkan status mereka sebagai penerima manfaat di bawah program ini, beserta tarikh dan masa untuk sesi taklimat orientasi di kedai runcit yang terdekat. Maklumat lanjut boleh didapati di www.mykasih.com.my/site/prihatin-kasih.

Dalam usaha untuk membantu dan memudahcara masyarakat yang terkesan, Kementerian Pembangunan Wanita, Keluarga dan Masyarakat melalui JKM juga telah menyediakan kemudahan permohonan Skim Bantuan Kebajikan secara dalam talian yang boleh dilayari melalui Portal Rasmi JKM www.jkm.gov.my atau ebantuanjkm.jkm.gov.my. Selain itu, untuk maklumat dan bantuan lanjut sila hubungi **Talian Kasih 15999 dan menerusi aplikasi WhatsApp 019-2615999 yang beroperasi 24 jam sehari.**

Atas prinsip kebajikan tanggungjawab bersama, konsep ***whole of society*** perlu dilaksanakan oleh semua lapisan masyarakat termasuk pemimpin masyarakat, ketua-ketua agama, ahli keluarga, jiran tetangga, ahli komuniti, NGO-NGO dan semua pihak di luar sana untuk memainkan peranan dalam memastikan

masyarakat yang terkesan akibat pandemik COVID-19 dapat diberi bantuan sewajarnya.

Lindung Diri, Lindung Semua.

Disediakan oleh:
Unit Komunikasi Korporat (UKK)
Kementerian Pembangunan Wanita, Keluarga dan Masyarakat